



INFO SILOS

Interni magazin Tvornice cementa Kakanj

Broj 32



KAKANJ CEMENT
HEIDELBERGCEMENT Group



Decenija uspjeha

Na tradicionalnom, 26.-om po redu, izboru najuspješnijih menadžera i kompanija jugoistočne i srednje Evrope, direktor Tvornice cementa Kakanj i generalni direktor HeidelbergCementa za BiH i Hrvatsku, Branimir Muidža, dobio je priznanje „Najmenadžer decenije“. Ova nagrada dodjeljuje se ljudima koji su više godina zaredom osvajali prestižna priznanja 'Najmenadžer godine' i tako dokazali da su, istinski, zaslužili priznanje. Svečana ceremonija je održana u sarajevskom Hotelu "Holiday Inn", uz prisustvo brojnih menadžera iz zemalja Evrope i većeg broja privrednih, političkih i javnih ličnosti iz BiH i regiona.

„Ovo je, prije svega, veliko priznanje za Tvornicu cementa Kakanj i svakako dodatni motiv i izazov za dalji rad. Tvornica cementa Kakanj, koja djeluje u okviru HeidelbergCementa – jednog od najvećih svjetskih proizvođača građevinskih materijala – u proteklih je deset godina izrasla u veoma uspješnu kompaniju koja je prešla granice Bosne i Hercegovine i postala veoma

respektabilna u međunarodnim okvirima. Velika mi je čast i privilegija biti u društvu najvećih kao što su prošlogodišnji laureat, dr. Ivo Josipović, predsjednik Republike Hrvatske, te ovogodišnji dobitnici priznanja gospodin Filip Vujanović, predsjednik Crne Gore, gospodin Toni Meggle, vlasnik kompanije Meggle, i Šarik Tara, vlasnik kompanije ENKA,“ rekao je Branimir Muidža.



Klijenti na prvom mjestu

U četvrtak, 14.06.2012., na svečanoj ceremoniji održanoj u Beogradu, Tvornici cementa Kakanj dodijeljena je nagrada "Regionalni biznis partner", koju već 18 godina dodjeljuje "Mass media international".



Dobitnici ove nagrade, koja je tokom godina postala prestižno poslovno, stručno i javno priznanje, su najbolje kompanije i institucije koje su u svom poslovanju postigle zavidan nivo, prihvatajući i striktno primjenjujući osnovni moto – U biznisu kao i u životu najvažniji je partner.

Ono što ovu nagradu čini drugačijom, posebnom i značajnom jeste činjenica da kompanije same predlažu i ocjenjuju svoje poslovne partnere za koje vjeruju da zadovoljavaju visoke standarde poslovanja, poslovne etike, odnosa prema interesnim stranama i ekološke zaštite.

Nagradu je uručio predsjednik žirija, prof.dr. Ilija Ćosić, dekan Fakulteta tehničkih nauka u Novom Sadu, a nagradu je ispred Tvornice cementa Kakanj primio Izudin Neimarlija, izvršni direktor za proizvodnju i tehnička pitanja. Neimarlija se zahvalio kompanijama koje su nominirale Tvornicu za ovu prestižnu nagradu i time pokazale da cijene trud i zalaganje koje kakanjska cementara ulaže u poslovno partnerstvo, te je naglasio da će ovo sigurno biti dodatni stimulans za još veća dostignuća.



Veća podrška stranim investitorima

Premijer FBiH, Nermin Nikšić posjetio Tvornicu cementa Kakanj i iskazao spremnost ispred Vlade FBiH pružiti veću podršku stranim investitorima. Implementacija preporuka iz Bijele knjige omogućava značajne uštede investitorima

Premijer Federacije BiH, Nermin Nikšić, federalni ministar za energiju, rudarstvo i industriju, Eldar Trhulj, i premijer Zeničko-dobojskog kantona, Fikret Plevljak, sa svojim saradnicima, posjetili su u srijedu, 03.10.2012. godine, postrojenja Tvornice cementa Kakanj koja od 2000. godine posluje u okviru jednog od najvećih svjetskih proizvođača građevinskih materijala, njemačkog HeidelbergCementa.

Rukovodstvo kakanjske cementare prezentiralo je investicije koje su provedene u proteklih dvanaest godina u iznosu od 170 miliona KM u ekološki program, proizvodne kapacitete, ljudske resurse i tehnologiju, te o daljem razvoju TCK, kao i budućim ulaganjima ovog investitora.

Generalni direktor Tvornice cementa Kakanj i predsjednik Vijeća stranih investitora, Branimir Muidža, zahvalio se Vladi Federacije na višegodišnjoj podršci. „Podsjetili smo se na sve aktivnosti koje je Tvornica cementa Kakanj imala od privatizacije do danas, i ovom prilikom upoznali Vladu FBiH o daljim planovima i budućim investicijama u BiH,“ rekao je Branimir Muidža.

„Tvornica cementa Kakanj je svijetli primjer privatizacije, i došli smo dati podršku i pokazati spremnost da ovog investitora pratimo dalje i omogućimo dalje investiranje u Bosni i Hercegovini,“ kazao je premijer Vlade FBiH, Nermin Nikšić.

Ovom prilikom razgovaralo se i o implementaciji preporuka iz Bijele Knjige i daljoj saradnji Vlade FBiH i Vijeća stranih investitora. „Vlada FBiH prihvatila je preporuke Vijeća stranih investitora, i od 360 evidentiranih administrativnih prepreka, do sada je uklonjeno oko 260, što investitorima omogućava uštede u visini od oko 100 miliona KM,“ rekao je Nikšić.

Muidža je istakao da Vijeće stranih investitora ostvaruje izvanrednu saradnju sa vladom FBiH. „Rušimo sve administrativne barijere na način da zajednički radimo na usvajanju konkretnih mjera, rješenja i prijedloga zakona kako bi se povećao broj stranih investicija u BiH,“ izjavio je Muidža, te istakao da je povećanje stranih investicija izuzetno važno radi rasta GDP-a i zapošljavanja, kao i boljeg standarda građana.“





Zlatna priznanja za zlatna dostignuća

Komiteet za nominaciju i izbor laureata, sastavljen od dobitnika najviših priznanja Internacionalne lige humanista, dodijelio Branimiru Muidži Zlatnu povelju „Internacionalni humanista desetljeća“, a Tvornici cementa Kakanj d.d. Zlatnu eko plaketu „Dr. Aurelio Peccei“.



U Zagrebu je 29. 11. 2012, uz prisustvo visokih zvaničnika i poslovnih partnera iz Bosne i Hercegovine i Hrvatske, Branimiru Muidži, generalnom direktoru HeidelbergCement grupacije za BiH i Hrvatsku uručeno vrijedno priznanje Internacionalne lige humanista – Zlatna povelja i Zlatna značka.

„Ovo priznanje dodijeljeno mu je zbog toga što je svojim znanjem, radom, stvaralaštvom, ljubavlju prema čovjeku i prirodi oživotvorio mnoge svoje ideje i ostvario rezultate na svim poljima svoga rada dostojne pažnje, pohvale i poštovanja. Prilikom ostvarivanja iznimnih poslovnih rezultata uvijek je vodio brigu

o potrebitima i vrijednim donacijama mnogima pomogao“ rekao je prilikom dodjele Zlatne povelje i Zlatne značke, generalni sekretar Internacionalne lige humanista, Zdravko Šurlan.

Priznanje je direktoru Muidži ispred Internacionalne lige humanista uručio akademik Predrag Matvejević. „Ovo je ne samo omaž jednoj tvornici, cementari, nego je to istodobno omaž Bosni i Hercegovini, istovremeno Puli, gdje se rodio ovaj kandidat, Istri koja je od svih naših sredina i republika i pokrajina možda najljepše i najdostojnije proživjela ove teške časove, teške sate, teške trenutke koji su za nama, i čini mi se da ovaj gest ide prema stvaranju jednoga stanja koje će biti drukčije, u kojem neće dolaziti do sukoba. Kakanj je u Bosni i Hercegovini dobio priznanje, i slavimo ga ovdje u Zagrebu, prijestolnici Hrvatske. To nije beznačajno,“ kazao je ovom prilikom akademik Matvejević.

Vrijedno priznanje, točnije Zlatna eko plaketa dodijeljena je i Tvornici cementa Kakanj koja je kao članica HeidelbergCement grupacije u posljednjih deset godina svoje poslovanje značajno unaprijedila po pitanju brige o radnicima i zaštite okoliša. Milioni eura uloženi u razvoj odgovornog i održivog poslovanja





doprinijeli su i širenju na bosanskohercegovačkom i hrvatskom tržištu. Plaketu je ispred Tvornice cementa Kakanj primio izvršni direktor Izudin Neimarlija koji se iskreno zahvalio ističući da je ovo vrijedno priznanje dodatni poticaj svim radnicima Tvornice da nastave davati svoj maksimalni doprinos zaštiti okoliša.

Ovom prilikom, generalni direktor HeidelbergCement grupacije za BiH i Hrvatsku, Branimir Muidža je, u ime kompanije TBG Beton, poslovnice HeidelbergCement



grupacije u Hrvatskoj, Općoj bolnici Pula uručio ček od 100.000,00 kuna za nabavku inkubatora i prateće opreme za zbrinjavanje prijevremeno rođene djece. Donaciju su preuzeli gradonačelnik Pule, Boris Miletić i ravnatelj bolnice, dr. Lems Jerin koji su tom prilikom zahvalili na vrijednoj donaciji.

„Veliko je zadovoljstvo uspješno graditi poslovanje i pritom biti u mogućnosti pomagati onima kojima je pomoć najpotrebnija. Također, lijepo je i kad to javnost prepozna, a ovo priznanje koje sam danas primio zauzima posebno mjesto u mom srcu jer dolazi od plemenitih ljudi okupljenih u Internacionalnoj ligi humanista. Za mene je ovo veliki dan i snažan poticaj da s pozicije generalnog direktora HeidelbergCement grupacije za BiH i Hrvatsku nastavim pozitivno razvijati poslovanje kompanije i da pritom zadržimo visoke standarde kada je u pitanju sigurnost i zadovoljstvo radnika, zaštita okoliša i društveno odgovorno poslovanje. Zato sam presretan što smo moji zaposlenici i ja danas zbog uspješnog poslovanja bili u mogućnosti donacijom pomoći Opću bolnicu Pula,“ rekao je prilikom svog obraćanja Branimir Muidža.



Na temelju članaka 2., 4. i 5. Pravila o nominaciji, valorizaciji i izboru laureata za najviša humanistička priznanja Internacionalne lige humanista, na prijedlog Komisije za nominaciju laureata ILH, predsjednik Stalnog komiteta ILH, donio je

ODLUKU
o dodjeli

ZLATNE POVELJE
«Internacionalni humanista desetljeća»
SA PLAKETOM I ZLATNOM ZNAČKOM

gosp. BRANIMIRU MUIDŽI, Hrvatska

I
Zlatna povelja "Internacionalni humanista desetljeća" sa Plaketom i Zlatnom značkom, gosp. Branimiru Muidži, dodjeljuje se za desetogodišnje djelovanje i rad sukladan načelima i principima Dubrovačko-filadelfijske deklaracije, programskim ciljevima i zadacima misije Internacionalne lige humanista u izgradnji kulture mira i dijaloga na prostorima Bosne i Hercegovine, Hrvatske i regiona.

II
Na prijedlog Komisije za nominaciju laureata Internacionalne lige humanista, a u skladu sa navedenim u članku I ove Odluke, predsjednik Stalnog komiteta ILH donio je Odluku kao u dispozitivu.

III
Za realizaciju ove Odluke starat će se Ured Internacionalne lige humanista.

Broj: 07-234/12
Sarajevo, 1. 11. 2012.

PREDsjedNIK
STALNOG KOMITETA ILH

Stjepan Mesic



Na temelju članaka 2., 4. i 5. Pravila o nominaciji, valorizaciji i izboru laureata za najviša humanistička priznanja Internacionalne lige humanista, na prijedlog Komiteta za ekologiju i turističko unapređenje lokalnih zajednica sukladno ciljevima i zadacima Europske povelje o lokalnoj samoupravi, predsjednik Stalnog komiteta ILH, donio je

ODLUKU
o dodjeli

ZLATNE EKO PLAKETE
«Dr. Aurelio Peccei»

TVORNICI CEMENTA KAKANJ d.d. Kakanj, BiH

I
Zlatna EKO plaketa "Dr. Aurelio Peccei", Tvornici cementa Kakanj, dodjeljuje se u znak trajne zahvalnosti i priznanja koju posvećuje zaštiti životne i radne sredine s ciljem da se postigne ravnomjeran i održiv razvoj u skladu sa europskim standardima.

II
Na prijedlog Komiteta za ekologiju i turističko unapređenje lokalnih zajednica sukladno ciljevima i zadacima Europske povelje o lokalnoj samoupravi Internacionalne lige humanista, a u skladu sa navedenim u članku I ove Odluke, predsjednik Stalnog komiteta ILH, donio je Odluku kao u dispozitivu.

III
Za realizaciju ove Odluke starat će se Ured Internacionalne lige humanista.

Broj: 07-235/12
Sarajevo, 1. 11. 2012.

PREDsjedNIK
STALNOG KOMITETA ILH

Stjepan Mesic



Priroda je najveći pobjednik!

Proglašeni pobjednici konkursa "Živi svijet kamenoloma". Cilj konkursa promocija biloške raznovrsnosti na kamenolomima. Na konkurs pristiglo više od dvadeset prijava. Najvažnija nagrada je veliko hvala od majke Prirode!

Svečana ceremonija proglašenja te dodjela nagrada i priznanja najuspješnijim učesnicima konkursa „Živi svijet kamenoloma“ održana je danas u Sarajevu. Svečanosti je prisustvovao veliki broj zvaničnika, predstavnika privrednog i javnog života Bosne i Hercegovine te medija.

Naime, Tvornica cementa Kakanj, članica HeidelbergCement grupacije okončala je prvi konkurs za nagradu pod nazivom „Živi svijet kamenoloma“ (the Quarry Life Award). Konkurs je pružio jedinstvenu priliku da se kroz projektne ideje okruženju kamenoloma da istinska ekološka i obrazovna vrijednost, a u cilju zaštite i promocije biodiverziteta kamenoloma.

Na konkurs se prijavilo 20 projektnih timova, od kojih je stručni žiri odabrao pet najboljih koji su u periodu od sedam mjeseci imali priliku da borave na kamenolomu „Ribnica“ Tvornice cementa Kakanj i da detaljno razrade svoje projektne ideje pokazavši tako svoje znanje i kreativnost u istraživanju i otkirvanju biljnog i životinjskog svijeta kamenoloma. Stručni žiri činili su gospodin Branimir Muidža, predsjedavajući žirija ujedno generalni direktor HeidelbergCementa za Bosnu i Hercegovinu i Hrvatsku, prof. dr. Emina Muratović, profesorica profesorica na Prirodno-matematičkom fakultetu u Sarajevu, prof. dr. Biljana Kukavica, profesorica na Prirodno-matematičkom fakultetu u Banjaluci, gospođa Derviša Sikira, profesorica biologije u gimnaziji u Kaknju.

U svome uvodnom obraćanju gosp. Branimir Muidža, generalni direktor HeidelbergCementa za Bosnu i Hercegovinu i Hrvatsku osvrnuo se na ulaganja HeidelbergCementa u Bosni i Hercegovini koja za protekli period iznose više od 150.000.000 KM, ističući kako je upravo Tvornica cementa Kakanj prva uvela standard zaštite okoliša i sistem oprašivanja te zaštite zraka, voda i tla. „Nagrada „Živi svijet kamenoloma“ HeidelbergCement grupacije, prvi je projekat takve vrste u svijetu, a samim tim i u Bosni i Hercegovini, namijenjen zaštiti biljnog i životinjskog svijeta kamenoloma, i Tvornica cementa Kakanj je ponosna



što je dio ovog jedinstvenog projekta. Ova nagrada je probudila duh istraživanja i otkrivanja. Otvorili smo novu stranicu i postavili nove standarde zaštite i promocije biodiverziteta na kamenolomima,“ istakao je gosp. Muidža

Od pet predstavljenih projekata tri su bila nagrađena. Treće mjesto na konkursu „Živi svijet kamenoloma“ osvojila je nevladina organizacija „EKO Kakanj“. Projekat pod nazivom „Rekreacijska zona HeidelbergCement“ osvojio novčanu nagradu u iznosu od 3.000 KM. Projekat pod nazivom „Biodiverzitet i





remedacija kamenoloma Ribnica“ pod mentorstvom prof. dr. Suvada Lele osvojio je drugo mjesto i nagradu u iznosu od 6.000 KM

Prvu nagradu i iznos od 10.000 KM osvojio je tim Dražena Kotrošana sa projektnom idejom „Inventarizacija gnjezdarica na kamenolomu Ribnica“. „Nisam se zaista nadao da ćemo osvojiti nagradu. Jako sam uzbuđen. Uvijek sam sanjao da ću podići pehar, drago mi je da je to bilo sa ovim timom. Zahvaljujem HeidelbergCementu na prilici da posjetimo kamenolom, na prilici da istražujemo. Otvorili su nam vrata



kamenoloma „Ribnica“ i dali nam priliku da stvorimo osnove za program praćenja ptica, njihove zaštite i upoznavanja javnosti sa prirodnim vrijednostima datog područja,“ u obraćanju je istako gđin Kotrošan. Skupu se obratila gđa Senka Balorda, ministrica zdravlja ZE-DO kantona koja je iskoristila priliku i



čestitala mladim ljudima na učešću u ovome projektu dodavši „Zahvaljujem Tvornici cementa Kakanj i HeidelbergCementu na izvrsnoj ideji i zaista se nadam da ćemo i u budućnosti saradivati u cilju zaštite čovjekove životne okoline“.

Gosp. Tomislav Lukić, šef ureda Federalnog ministarstva turizma i okoliša, istakao je: „Rijetki su ovakvi događaji. Tvornica cementa Kakanj je dokazala da se može paziti na okoliš bez obzira na to što je teško izvršiti revitalizaciju kamenoloma. Ovom prilikom pozivam i druge kompanije u BiH da se pridruže i budu prijatelji okoliša.“

Podsjećamo, HeidelbergCement grupacija objavila je međunarodni konkurs u istraživačkom radu pod nazivom „Živi svijet kamenoloma“. Tvornica cementa Kakanj, kao članica HeidelbergCement grupacije, za ovaj konkurs otvorila je vrata svog kamenoloma „Ribnica“. Učestvovati na konkursu mogli su učenici, studenti i istraživači, koji su svoje prijave poslali do 17.02.2012. za jednu od četiri kategorije: otkrivanje biodiverziteta na kamenolomima, biodiverzitet i rehabilitacija, biodiverzitet i obrazovanje te upravljanje biodiverzitetom tokom ekstrakcije sirovine. Svih 5 finalista čiji projekti su bili predstavljeni, među kojima su i tri danas nagrađena, direktno su se plasirali za učešće na međunarodnom takmičenju na kojem su učestvovali predstavnici 18 zemalja svijeta. Tri nagrade za najbolje projekte na globalnom nivou u iznosu od 10.000, 20.000 i 30.000 eura dodijeljene su na svečanoj ceremoniji 13.12.2012, u Hiedelbergu, a svakako najvažnija nagrada je veliko hvala od majke Prirode! Nagrada „Živi svijet kamenoloma“ je prva nagrada ove vrste u svijetu, i u BiH.



TBG BH beton za buduća pokoljenja

Prokopan tunel Vijenac - najveći infrastrukturni objekat u BiH - među pet najdužih tunela u bivšoj Jugoslaviji - jedan od 93 koliko ih je planirano na koridoru 5C - u najznačajniji infrastrukturni objekat na Koridoru 5C ugrađeno 47.000 m³ vrhunskog kvaliteta naše firme TBG BH d.o.o.



Događaj koji je obilježio prvi kvartal 2013. godine u svijetu bosanskohercegovačkog građevinarstva svakako je probijanje tunela Vijenac na Koridoru 5C, koje se svečano odvijalo 1. marta prokopavanjem žive stijene iznad koje je tristometarski pokrivač. Probijena je jedna, takozvana lijeva cijev tunela, a u drugoj je preostalo još oko 300 metara, što bi trebalo biti prokopano do kraja marta, čime će biti završena prva faza gradnje.

Ovaj tunel, koji će ubuduće nositi ime „1. mart“, je trenutno najzahtjevniji građevinski objektu na autoputu na Koridoru 5C i najveći tunel koji je jedna bosanskohercegovačka firma ikada prokopala. Iskop tunela vrši se po takozvanoj austrijskoj metodi, a na gradilištu je angažovano više od 300 radnika u tri smjene.

Sa dužinom od 2.900 metara, ovaj tunel bi trebao biti drugi po dužini tunel na autoputu na koridoru 5c od

Save do Ploča. Na ovoj relaciji predviđeno je da bude u 93 tunela, a duži od Vijenca bi trebao biti samo tunel koji će se graditi na sjeveru Mostara, dugačak šest kilometara.

Inače, na izgradnji tunela radi više od 300 radnika u tri smjene, a konzorcij sačinjavaju domaće firme, a jedan od ključnih dobavljača betona vrhunske kvalitete je mobilna betonara naše kompanije TBG BH smještena u Drivuši. „Veoma smo ponosni što je naš beton izabran kao najbolji da bude ugrađen u ovaj važan infrastrukturni objekat koji će, iskreno se nadam, stoljećima služiti generacijama koje ostaju iza nas,“ kazala je Ehlimana Šehmehmedović, direktorica TBG BH.

Firma TBG BH, koja za spravljanje betona koristi isključivo materijale vrhunske kvalitete, u ovaj tunel do sada je od ukupnih 82.000 ugradila 47.000 m³ betona. „Beton koji ugrađuje TBG BH je visokokvalitetni beton

i ispunjava sve EN standarde u pogledu kvalitete," kaže Enhad Goralija, rukovodilac mobilne betonare i glavni laborant TBG-a. „Beton se kontroliše na betonari u Drivuši i na samom mjestu ugradnje. Pored toga kontrolu proizvodnje vrši IGMAT institut kao unutrašnja kontrola i GIT Tuzla institut kao vanjska kontrola na projektu izgradnje tunela Vijenac. Pored toga sve to nadzire IGH Institut iz Zagreba, što potvrđuje da se svaki materijal koji se ugrađuje na tunelu Vijenac podliježe strogoj kontroli," dodao je Goralija.

Tunel će biti opremljen najsavremenijom opremom, a put između Sarajeva i Zenice skratit će za šest kilometra. Ukupna dužina tunela iznosi skoro tri kilometra, dok je dužina obje tunelske cijevi 5.680 metara. Vrijednost projekta je oko 65 miliona eura, a tunel se gradi u skladu sa evropskim normama i po EN standardu. Na svakih 250 m se nalazi veza između dvije tunelske cijevi kao pješačka – evakuacijska veza dok se na svakih 1.000 m nalazi povezanost dvije tunelske cijevi za pristup vozilima. Pored toga tunel će biti jedan od najsavremenijih u regionu i sadržavati će sve elemente koji su neophodni u pogledu kvalitete i sigurnosti.

TBG BH aktivno učestvuje u izgradnji ostalih infrastrukturnih objekata na ovoj dionici autoputa od Drivuše do Gorice, i do sada je ova firma u vijadukte i mostove ugradila oko 38.000 m³ betona vrhunske kvalitete.

Krajnji rok za završetak radova na tunelu Vijenca je kraj 2014. godine, a očekuje se da prvi automobili prođu kroz njega u proljeće 2014.



Bolje spriječiti nego liječiti

Sedmica sigurnosti organizovana po drugi put u cijeloj HeidelbergCement grupaciji. Ove godine fokus na sigurnosti u saobraćaju i zaštiti od požara. Besplatan pregled auto-sjedalica za sve zaposlene i sve građane Kakanja.

Briga za sigurnost i zdravlje na radnom mjestu jedan je od najvažnijih principa poslovanja HeidelbergCement grupacije i svih njenih poslovnica jer se zaposleni smatraju najvažnijom karikom u lancu uspjeha ove kompanije. Stoga se već drugu godinu zaredom u cijeloj HeidelbergCement grupaciji održava Sedmica sigurnosti u okviru koje kompanije nastoje promovirati sve oblike zaštite na radu i zaštite zdravlja radnika uopšte.

Tim povodom, u Tvornici cementa Kakanj, kao i u njenim poslovnicama u Banja Luci i Sarajevu, te u kćerkama kompanijama TBG BH i TBG Beton (Hrvatska), organizovane su dodatne obuke koje se odnose na važnost nošenja zaštitne opreme i čuvanje zdravlja, ne samo za zaposlenike, nego također i za radnike drugih kompanija koje pružaju usluge i izvode radove za Tvornicu cementa Kakanj.



0 povreda na radu

Od uvođenja standarda OHSAS 18001:2007, 2006. godine do 2012. godine, u Tvornici cementa Kakanj, od strane ovlaštenih certifikacijskih kuća i agencija, provedeno je 6 eksternih audita važećih sistema od kojih su 2 bila recertifikacijska, u 2012. godini proveden je II recertifikacijski audit. Potvrđeno je da smo ne samo izvršili identifikaciju opasnosti i procjena rizika na svim radnim mjestima u Tvornici cementa Kakanj, ostvarili postavljene ciljeve i planove upravljanja kako bi se svi potencijalni rizici sveli na dopustivu i prihvatljivu mjeru, nego unaprijedili sistem u tolikoj mjeri da **ove godine nije zabilježena niti jedna povreda na radu.**



Namjera projekta je prepoznavanje značaja segmenta sigurnosti na radu i od strane porodica naših zaposlenika. Cilj nam je bio da se u projekat uključe i djeca zaposlenika kroz prigodnu izložbu likovnih radova koji su za temu imali poznavanje saobraćajnih znakova i drugih pravila koja obezbjeđuju sigurnosti u saobraćaju.

Kroz drugi naglašeni segment Sedmice sigurnosti, protiv požarne zaštite, zaposlenici su imali dvije veoma bitne praktične vježbe; unutar kruga Tvornice



–gašenje požara na poslovnim objektima u krugu, i vježba otvorenog tipa – gašenje šumskog požara na Kamenolomu, u kojoj su učestvovali i pripadnici profesionalne vatrogasne jedinice kao i zaposlenici zaštitarske firme koja pruža usluge obezbjeđenja. Kroz obadviije izvedene vježbe pokazan je dostignuti visoki stepen spremnosti i obučenosti zaposlenika i trećih lica za sve eventualne situacije u kojoj bi ljudski životi i imovina Društva mogli biti ugroženi.

Rukovođenje na siguran način

Kada se radi o zaštiti na radu, od svakog pojedinca se zahtijeva da dâ svoj doprinos: i Uprava, i rukovodioci i zaposleni. U cilju unapređenja rukovođenja na siguran način, HeidelbergCement je obezbijedio obuku za sve rukovođeće kadrove u svim svojim kompanija. Obuku pod nazivom „**Leading with Safety**“ proveli su stručnjaci međunarodne konsultantske kuće Best Solution, SAD. Obukom je bilo obuhvaćen 21 zaposlenik iz BiH i Hrvatske, pripadnici srednjeg reda menadžmenta.



Besplatan pregled autosjedalica

20.10.2012. u periodu od 10:00h do 12:00h na parkingu Tvornice cementa Kakanj, održan je besplatni pregled autosjedalica za sve građane Kaknja pod pokroviteljstvom Tvornice cementa Kakanj, a u okviru ovogodišnje *Sedmice sigurnosti*.

Stručnjaci udruženja “DjeCa” napravili su kontrolu ispravnosti sjedalica, kontrolu ispravnosti montiranja, ukazali roditeljima na najčešće greške prilikom montiranja i pružili savjete u vezi sa ispravnom upotrebom autosjedalica.



Poseban dan

Tvornica cementa Kakanj obilježila 34. godine rada. Za sve zaposlenike, penzionere i porodice poginulih i preminulih radnika obezbijedene nagrade i prigodni pokloni, i organizovan svečani ručak. Dodijeljena priznanja i jubilarne nagrade.

15. decembra 2012. navršilo se tačno 34 godine otkako su izašle prve tone "sivog zlata" iz pogona kakanjske cementare. Tim povodom 14. decembra u prostorijama Tvornice cementa Kakanj organizovano je druženje sa radnicima, penzionerima i porodicama preminulih radnika i penzionera.

Uspjesima Tvornice najviše su doprinijeli radnici koji svojim nesebičnim angažmanom i radom čine da ova firma bude primjer uspješnog rada i poslovanja na ovim prostorima. Upravo njima Tvornica cementa svake godine na obilježavanju godišnjice postojanja dodjeljuje posebna priznanja za 25 godina rada. Ove godine priznanje je dobio Adem Tuka. „Osjećaj je

prelijep kad te neko ovako priznaje i dodijeli ovu lijepu nagradu,“ kazao je Tuka.

Pored priznanja za 25 godina rada, svake godine na posebnoj manifestaciji obilježavanja godišnjice rada Tvornica cementa Kakanj upriliči prijem za svoje penzionere te članove porodica umrlih i poginulih radnika. „To je prilika koju koristimo da razmijenimo iskustva, da mi vidimo kako oni žive, a njih zanima kako cementara radi i koje su novosti. To je također prilika da im uručimo poklone. To je dan kada smo svi jako emotivni i kada srećemo svoje bivše kolege. To je stvarno poseban dan za sve nas,“ kazao je Izudin Neimarlija, izvršni direktor za proizvodnju i tehnička pitanja.



Očistimo planetu za jedan dan

**Volonteri Tvornice cementa Kakanj u akciji "Let's do it!" - očistimo planetu za jedan dan.
 Tvornica cementa Kakanj obezbijedila osvježenje
 i priručni materijal za sve učesnike akcije.**

Uvijek spremna da inicira i učestvuje u programima i akcijama zaštite okoliša, Tvornica cementa Kakanj se uključila i u globalnu akciju pod nazivom „Let's do it“ – očistimo Zemlju za 1 dan. Oko 30 volontera radnika cementare pridružilo se kakanjskim školama, nevladinim organizacijama i drugim subjektima, a zadatak je bio čišćenje obala rijeke Zgošće u centru grada, što je prema ocjenama stručnjaka, jedna od najugroženijih dionica.

„U svakoj prilici nastojimo promovirati zaštitu okoliša i kod naših radnika podizati svijest o značaju njihovog

angažiranja u svim aspektima poboljšanja života u našem kolektivu i lokalnoj zajednici, a i šire. Iskreno se nadam da ćemo i na ovaj način potaknuti naše susjede i sugrađane da se odazivaju na ovakve akcije, te da svakodnevno vode brigu o odlaganju otpada, koji je u većini zemalja Evrope danas izvor energije i primanja za mnogobrojne radnike,“ izjavio je Branimir Muidža, direktor Tvornice cementa Kakanj.

Pored učešća volontera, Tvornica cementa Kakanj je obezbijedila i osvježenje i priručni materijal za učesnike akcije na području općine Kakanj.



Dodi, vidi, pobijedi!

I u kriznim vremenima tradicija se nastavlja uz brojne sadržaje za one najmlađe, a sigurno i one nešto starije. Mnoštvo sadržaja za djecu, sportskih susreta, zabave, nagrada, poklona i osvježenja.

Manifestacija Dan otvorenih vrata, koju je Tvornica cementa Kakanj već jedanaestu godinu zaredom organizovala za sve svoje sugrađane, odvijala se pod sloganom "Dodi! Vidi! Pobijedi!" u subotu 30. juna.

I ovaj put smo pripremili brojne sadržaje koji su obilovali zabavnim aktivnostima za djecu, sportskim susretima, izložbama, nagradama, poklonima i osvježenjima, a sve na terenima u krugu Tvornice.

Poseban akcenat je i ove godine stavljen na aktivnosti i zabavu za najmlađe koji su uživati u mini golfu, mađioničarskoj predstavi, gumenom gradu, slikanju po licu (face painting), vožnji na voziću, loptama za hodanje po vodi te mnogim drugim igrama spretnosti, uz mnogobrojne poklone.

Program također obiluje sportskim aktivnostima uključujući turnire u odbojci na pijesku, street basketu, mini nogometu i badmintonu, dok se učesnici kros i biciklističke utrke takmiče na ruti koja prolazi kroz cijeli tvornički krug. Pored toga, najmlađi posjetitelji imali su priliku nadmetati se u utrci u vrećama za djecu, a posebno atraktivno takmičenje je utrka za

bebe. U revijalnom programu su se predstavili članovi klubova borilačkih vještina iz Kaknja. Za sve učesnike obezbijedeni su pokloni, a za one najbolje i vrijedne nagrade.

Svoje vještine pokazali su i radnici Tvornice koji su se nadmetali u radničkim igrama. Tri najbolje ekipe osvojile su rafting i sportske rekvizite, a nagradne koverte im je uručio generalni direktor Tvornice cementa Kakanj, Branimir Muidža: „Uvijek sa uživanjem pratim nadmetanje naših radnika jer je Dan otvorenih vrata dodatna prilika da se bolje upoznamo i družimo. Posebno me raduje što su nam se ove godine pridružile kolege i kolegice iz Hrvatske, i nadam se da će nas svake godine biti sve više,“ rekao je Muidža.

Svi posjetioci su mogli uživati u izložbi likovnih ostvarenja kakanjskog UG „Duga“ koje je za ovu priliku pripremila i likovnu radionicu za najmlađe. I ove godine su članice udruženja UŽOK izložile svoje najbolje rukotvorine, a mladim naraštajima data je prilika da uče tradicionalne tehnike tkanja. Posebna poslastica već nekoliko godina je izložba i degustacija meda koju priređuju članovi udruženja pčelara „Bagrem“ .







Impresum

Info silos – interno glasilo Tvornice cementa Kakanj
Broj: 32

Izdavač:

Tvornica cementa Kakanj d.d. Kakanj
Selima ef. Merdanovića 146
72240 Kakanj
Tel: 032 557 500
Fax: 032 557 600

Za izdavača:

Branimir Muidža, generalni direktor
e-mail:
branimir.muidža@heidelbergcement.com

Uredništvo:

Emina Dedić
emina.dedic@heidelbergcement.com
Mahira Softić
mahira.softic@heidelbergcement.com

DTP: Emina Dedić

Štampa: Atlantik bb Banjaluka

Foto: Emina Dedić, Alen Kubura, Rajko Boričić, Tvornica cementa Kakanj, HeidelbergCement, JP Autoceste, Enhad Goralija

Broj strana: 12

Tiraž: 350 primjeraka